



L'antiera squadra dad Anna Laura Klucker a la fegn da las lavurs da filmar: Anna Laura, Carmen, Erica Klucker, Anna-Lena Weyermann, Märta Strömstedt, Tim Hofer.



Igls vastgieus da nozas vignan films da tut igls mäs.

FOTOS MAD

Egn iert da rosas a vastgadira da nozas

DA BARTOLOME TSCHARNER/FMR

■ **Igl tschiel mussa igl ple beal azur. Agl curtgegn flureschan las rosas da las ple diferaintas calurs a davostier parade-scha igl casti da Haldenstein. Aint da la porta rivan, egna suainter l'otra, duas matas an vastgieus da nozas ad an compagneia d'egna matatscha ca porta egn beal matg flurs.** Ellas passan mintgegna sut l'arcada flurainta a fan buca da rir. Me igl spus ca manca. Quegl spetg'ign adumbaten – a las «spusas» van betg a nozas. Da tsche mäs digl iert e numnadameing puosto egn um cun egna camera ca filmescha l'antrada festiva da las «nozaduras». Assi-

stieu vean el dad *Anna Laura Klucker*, la stgafidra da quels vastgieus da nozas. Ella tira igls fils co las matas an da saposiziunar a sapeschantar: da davant, da davos, mussand tutas originalitads da la raglia, dessigneada a fatga da Klucker agl sieus atelier a Tamegn. Davos las culissas e la mama *Erica* ca procura ca mintga vastgieu steti bagn a la «nozadura» a c'igl belet consteti a fetschi resortir la balteztga da la mata a digl vastgieu. «La raschun ca nus vagn fatg que film e ca jou less migliurar mia pagina d'internet, far ella anc ple atractiva a surtut interactiva», gi Klucker. Igl film da *Tim Hofer* cun las duas matas model a la par part nova colecziun da vastgadira da nozas

d'Anna Laura e da vaser segl ple tard davent da la fegn da fanadur segl frontispezi da la sia pagina d'internet. *Carmen Klucker* a *Märta Strömstedt* en experientadas da mussar la vastgadira da nozas dad Anna Laura, ellas an fatg part da pliras preschantaziuns a mostras publicas igls davos dus ons c'igl dat «yuli», la marca da la giuvna dessigneada da Tamegn. «La sia raglia da nozas e da balteztga classica, practica da schubgear a grandiusa da cumbinar», quegl e igl giudicat d'egn'expert an tgossa.

Configurar igl vastgieu a tgea

Par ca la pagina d'internet dad Anna Laura davainti betga me atractiva, mobagn

ear interactiva integrescha ella ear egn configuratur sen quella. «Parquegl c'igls meas vastgieus cunsistan da pliras parts, pliras rassas a pliras parts sura, san las dunnas ussa sezas tschearner co ellas vessan bugent cumbino la rassa cun la part sura», anunzta Anna Laura la novaziun sen la sia pagina d'internet. «D'integrar egn configuratur sen la mia pagina eara da gitg annà meus siemi», palainta ella. Uss à egn programader fatg pussevel quella funcziun tecnica. Funcziunar funcziuna quegl ascheia c'ign veza egn model cun egn vastgieu an duas parts: Scha la clianta clichegia par exaimpel sen la part sura mida quella stil a calur.

Sch'ella clichegia sen la rassa mida ear quella. An tut à Anna Laura cargieu mintgame passa 50 diferaintas cumbinaziuns pussevelas. Las fotos par quellas cumbinaziuns à ella fatg seza. L'intenziun digl configuratur e ca las cliaintas vezan immediat co lur cumbinaziun preferida sapeschainta. El e peia duple ca me egn element da giujear, el semplifitgescha la schelta a las cliaintas ca van alura tier la dessigneada ad an gea egn'ideia clera da lur vastgieu preferiu. A vurdand ear anc igl film suvignan ellas gea ordavànt egn impressiun da quel. Digl rest, igls vastgieus da nozas da «yuli» pon ign betga me purtar durànt igl fanadur.



Dacurt à Gieri Battaglia surdo la Flora Helvetica agls manaders da la tigia da skis da Veulden Elias Koller a Melanie Sulger Büel (cun feglia Aita).

FOTO GIERI BATTAGLIA

«Mission Cabane – Missiun Tgamonas»

■ **(fmr/bt) La fegnamira da la «Mission Cabane» e ambiziusa: Mintga tgamona alpina an Svizra de disponer antoca la fegn da quest on digl cudesch da determinar plantas «Flora Helvetica».** Tut igls viandaders amatur da la natira ancanuschan franc que santimaint: Suainter egna buna tschagna an la tgamona resaintan ign igl basegns da far egna pintga spassageada. Cun quell'ocasiun observ'ign egna beala flur nunancuschainta ad ign savess bugent co ella vegi num. Sch'ella segi rara, parfegn periclitada da sparir? Sch'ella flureschi me egn on near plirs ons? Ear la squadra da la tgamona sa savens betga gidar. Egn botanist near ancunschider da plantas e ear betga gest tranter giasts da la tgamona.

Par que cass dat igl novitads flurusas: La Sozietad botanica svizra à fatg igl parpiest da meter a disposiziun gratuitameing a mintga tgamona digl CAS ad a mintga tigia da muntogna antoca la fegn digl on 2020 egn exemplar da la Flora Helvetica, que cudesch rehameing illustro ad ovra standard tge ca partutga la botanica svizra. La schànza e grànda da catar la flur ancuretga an quell'ovra cumplissima.

La «Mission Cabane» e egn'aziun cuminevla da la Sozietad botanica svizra an cunlavor cun las sias secziuns regionalas, dad Info Flora, digl Club alpin svizer CAS a da possessurs da tigas da muntognas.

Egn da quels cudeschs cun passa 3200 fotografias e ussa ear da catar an la tigia da skis da Veulden. Quella satgata datier da la

staziun da la sutgera Veulden–La Mutta a 1947 m sur mar. Ella vean manada gea la savunda stad da *Melanie Sulger Büel* ad *Elias Koller*. An quella partgirevla tgamona pon ign maglear bagn, giuder diversas bavrandas a graztga a l'aria digl òlt ear durmir staga a bagn. Tut las infurmaziuns tgat'ign sen la pagina www.skihuettenfeldis.ch.

Gieri Battaglia (Rorschach/Veulden) à dacurt surdo agls dus patrùns egn exemplar da la Flora Helvetica sco regal, igl qual els dus, co igl maletg mussa, an ratschiet cun plascher.

Digl rest: Info Flora tarmeta a tut igls varda-tgamonas antoca las fegn da quest on egn glista da tut las spezas da plantas ca vignan anunz-teadas c'ellas creschian agl danturn da la tgamona!

Buna amprema fiera d'Andeer

■ **(fmr/bt) Da 23 ons annà organischan anzaquants produzents da products regionalis var tschentg fieras da stad sen la plaza avànt igl Volg ad Andeer ca meta ear a disposiziun gratuitameing las mesas da vendita. Quest on àni gieus da disgir quella digls 30 da matg. An sonda passada àni tutegna ristgieu da far l'antscheata.** «Nus vagn vieu igl basegns d'organisar egna fiera, partge la glicud va utro a far las cumpras, ad alura, scha nus fagiagn nut, pardainsa la nosa cliantela», constatescha *Christian Köfler*, conditur a coordinatur da quellas fieras. Par questa fiera àni gieus da prender masiras spezialas. «Ad igl noss concept cun las distanzas da quater m a tutas masiras da sirtad sco desinfectant, mascras a guants, quegl à funcziuno bagn», aschunta el. Els vevan paragieu tut quegl c'igl drova, conform a las prescripziuns. «A la glicud sategna ear bagn ve da quellas, i datan adatg a spetgan cun distanza», en las observaziuns da Köfler. «Ascheia cres jou ca nus stgagn sainz'oter far las proximas tres fieras previdas scha la situaziun sanitara samida betga fetg ad

igl cunzegl federal fa betga novas prescripziuns.»

A l'amprema fiera d'Andeer e'gl sto me sis vandiders c'an fatg vanal lur products a spezialitads sco liongias da tgarn nursa, andutgels da tgarn tgora, meal d'avieuls, liquors, odorants natirals a las usitadas turtas a petas. Malgro ca la (basignevla) plievgia à g'l'aprem ratanieu ampo la cliantela da vagnir e quella rivada ple tard. «La finala e'gl tutegna sto egna buna fiera», bilanzescha Köfler. «Igl e rivo egn'otra cliantela c'oters ons. Tut igl ple ear'igl Svizers. Quels cumpran cur c'i passan las mesas a vezan igls products indigens.» A vacanzadurs à'gl daret ad Andeer. Parquegl dastga Köfler concluder ca tut igls vandiders vegian vandieu bagn a segian cuntaints. «Mo propi l'atmosfera da fiera sco igl eara oters ons e uon ida a pearder ampo parveia da las gràndas distanzas», constatescha *Ursin Tiri*, pur a cultivatur da verduras. «Mo igl e da far ascheia a la noss'amprova e cuntantevla.»

Las proximas tres fieras d'Andeer an liac igls 25 da fanadur, igls 1. d'avust ad igls 8 d'avust.



Vesta sen egna part da l'amprema fiera da products da Schons d'uon ad Andeer. Parveia da las distanzas e'la stada ampo sparpaglieada, mo tutegna cuntantevla pigls produzents.

FOTO BARTOLOME TSCHARNER